

浙
江
通
志
一

光緒二十五年十月重刊

浙江通志

商務印書館影印



景印浙江通志序

博稽故實淹貫人文以昭進化跡象而資羣治考鏡若是者在國爲史在地方爲志乘會稽章氏謂方志爲國史要刪新會梁氏亦稱良史成於良志蓋方志之作與史雖異其揆一也浙江爲東南文化重心周末以還秉筆纂述代有其人遠如越絕書吳越春秋及漢之三郡記吳之會稽土地記殆均方志權輿宋室南渡臨安尤繫宗社之重自時厥後文物蔚興州邑志乘蒐輯漸夥而省志之作則昉自明薛應旂所輯通志清康熙間浙督趙士麟曾因薛志增修倉卒蕝事殊病簡略雍正七年詔各省修志浙督李衛設局編纂凡歷五年成志二百八十卷迨乾隆初總督嵇曾筠更爲補訂表上付刊光緒二十五年復經浙江官書局重刻卽今本通行者是四庫總目稱其體例視他志

爲優蓋篤論也。滌平退食之餘嘗加瀏覽以爲措施輦鑑竊以浙省承平日久人文薈萃著述斐然而自乾隆至今二百年間斯志迄未續纂兩浙文獻散佚堪虞輒擬重修顧時事方亟庫帑正虛而纂輯事繁經始匪易前茲執政諸公亦曾屢議屢寢有志莫逮遭時倍艱深可慨嘆是書取材豐備足爲方志規範司政教者果能人手一編好古敏求於以明乎一省典章文物之遺攸關國計民生之鉅更因浙人士對歷史文化之供獻激勵其興亡有責之心警覺提撕於是乎在今商務印書館就舊本景印俾廣流傳蓋卽斯意旣嘉惠士林裨益文化亦足爲他日省志續修之嚆矢故樂爲之序

民國二十三年七月魯滌平

勅修浙江通志序

自班固易八書為十志而郡縣徵文考獻之書亦各以志名兩浙為東南名區若統十一郡而通為一編則自前明方山薛應旂始今覽其記載雖一省之土地險易政事沿革在綱不紊惜乎體製之未備考訂之未詳迨康熙癸亥復徵耆碩分任修輯以數月告竣且局於薛之門類未能遽稱盡美我

世宗憲皇帝振綱肅紀百廢具興

特允廷臣之請

命將各省志書重加編纂務得完善以資采擇奉

詔之後即啟館聚書遴聘淹貫之士考核刪訂經始於雍正

九年脫稿於十二年冬而繕本授梓則十三年秋也

為門五十有四卷二百有八十視舊志為加詳焉甲

寅冬 臣 玉麟銜

命兼轄兩浙由閩疆取道栢蒼經東甌歷西越駐節武林以

次徧巡浙地見夫井疆戶口之殷庶士習民風之謹

醇以及山川城郭軍營斥堠之雄武整飭仰見我

朝之

列祖

列宗經營締造休養生息率土化成遠邁隆古兩浙則尤沐

湛恩之渥而風移俗易者也今

上續承大統勤求治理薄海內外罔不率俾是志之輯正

以上昭

朝廷之謨訓功烈下著臣民之節概文章而疆域土物之

屬亦采之詳而考之確焉庶足以潤色鴻業揚扈休

明豈獨故實有徵為一時之觀美已也 臣 玉麟學慙

稽古識昧通經縱使夙夜研求無裨志乘而忝列封

圻率屬校讎罔敢憚勞例得臆言以識簡端俾天下

知一道同風之盛有如是而 臣 得附名以垂不朽云

乾隆元年七月

誥授光祿大夫兵部尚書福浙總督前總督福建浙江等

處地方軍務兼理糧餉兼都察院右副都御史拜他

拉布勒哈番加入級紀錄三十八次功加一等 臣 郝

玉麟謹撰

勅修浙江通志序

雍正十年歲在壬子臣以菲材恭膺

世宗憲皇帝簡命節制兩浙於時方修通志稟輯未竟綏理

之暇重加參稽竊見十一郡舊志其僅存於今者如

咸淳之臨安嘉泰之會稽至元之嘉禾及赤城新定

諸志而已自明洪永以後增修繼作下逮屬縣纂述

紛紜然未有省志也省志則自嘉靖中華亭徐文貞

階始武進薛方山應旂踵成之我

朝重熙累洽共軌同文四遠來賓八荒在宥方輿之式廓

聲教之誕敷為前古所未有而兩浙曾經

聖祖仁皇帝翠華南幸

恩綸疊沛六十餘年休養生息人物之彬郁都邑之雄富

水泉之疏衍財賦之豐饒風俗之醇茂疆理之規畫

至美且備攬筆而書之宜有以紀鴻懿而昭炳蔚矣

顧自康熙乙丑前撫臣趙士麟嘗因薛志之舊損益

成書而菁萃舊聞尚多脫略標序章憲未見詳明茲

特加博采粹然具備前志分三十七門今引其緒而

增益之類十有七合五十四門計二百八十卷凡官

斯土者援章考索伏覽

天章可以瞻鴻編之輝耀焉載聞

獨恤可以仰膏雨之隆洽焉於海塘海防可以見阻阨之

克固焉於積貯漕運可以見儲備之有道焉於錢法

鹽法權稅驛傳可以見經制之咸宜焉於經籍碑碣

可以攬遺文而補缺失焉於名臣忠臣武功循吏介

節可以傳駿烈而溯清徽焉

聖治愈隆大文彌著則今之增於舊者固處於不得不詳

之勢而非以夸多而競富也書既成將付剞劂更延

紳士校勘蓋兢兢乎慎之矣恭惟我

皇上纘承大統綏猷建極富有日新兩浙之民咸沐浴福

應被潤澤於無窮盱衡盛美其將何以揚扈臣奉

命還都旋督漕運未能躬竣厥事越丙辰浙藩司以臣曾

董是役復寄刊本展卷洛誦迴環再四仰見我

國家之消化至治歷歷在是而千載之掌故洪纖悉備焉

庶乎足以備外史之傳而呈

乙夜之覽矣臣雖謏陋不文然茲浙四載是書之本末同

異甄綜討覈未嘗少懈奚敢不颺言簡端而自外於

右文之世也是為序

乾隆元年六月既望

誥授資政大夫總督准揚等處地方漕運海防提督軍務

前總督浙江等處地方軍務兼理糧餉管巡撫事兼

浙江通志 序

理兩浙鹽政兵部右侍郎兼都察院右副都御史加

一級紀錄十一次臣程元章謹撰

勅修浙江通志序

浙東西郡縣自漢以後隸揚州刺史唐隸觀察節度

宋隸安撫使元置江浙等處行中書省逮明洪武初

改為浙江承宣布政使司領郡九後以嘉興湖州二

府來屬領郡十一

國朝因之而浙江遂為東南屏翰之首任斯職者不綦重

歟臣自筮仕以來歷官不離浙土今奉

命旬宣夙夜祗懼愧未能勉稱厥職以仰副

聖天子任使之恩意而用以考鏡得失周知政俗則惟志

乘是資蓋志乘者經國之典章致治之龜鑑也欽惟

世宗憲皇帝德盛化神萬方在宥而宵旰勤民不遺遐邇

特命直省纂修通志進呈

睿覽煌煌乎甚鉅典也浙江於雍正九年開局編纂前督臣

相繼裁定於雍正十二年冬先繕稿本咨送

一統志館以備采擇明年秋七月遂以十二年所定之

本檢付剞劂恭逢

皇上御極之始善繼善述庶政方新德洋恩普而覃敷於

浙土者尤至深至渥自宜恭紀簡端以昭示萬古於

是官保大學士制府臣曾筠增纂至雍正十三年而

是書克成既延紳士俾任校讐之役而臣復取其已

校者躬自點勘反覆加詳焉閱一歲而訖工總為二

百八十卷嘗攷舊通志原本前明薛志體裁大略相

同今是書之成則綜薛志舊志而損益更定之卷首

恭錄

詔諭

聖製為全志之綱領所謂大書提要依經以樹則附聖以

居宗者也考故實增舊志者四曰封爵曰祥異曰經

籍曰碑碣紀時政增舊志者八曰蠲恤曰漕運曰積

貯曰錢法曰海塘曰海防曰權稅曰驛傳而人物一

門則增名臣忠臣循吏武功介節而析孝友義行為

二合儒林文苑隱逸為十蓋變文以起例依類以定

名贈而不穢詳而有體可謂殫歲月之纂組羅竹素

之賚琛者矣抑臣循覽是編伏觀兩浙自設輝藩以

來克舉其職者如孫原貞之武功白圭之蠲賦余子

俊之講水利劉璋之益軍儲韓鎮之築隄捍海畢亨

之發帑賑濟張憲之封議羨銀雍泰之嚴絕私販潘

思之禁斥貪墨熊遠之籌畫芟蒙詔之丕釐法紀

王基之殫精綜核他若涖政勤敏如王鈍執守堅定

如徐源忠厚仁恕如杜謙節用愛人如劉大夏敦本

崇儉如李贊鋤奸雅惡如蔣昇莫不樹駿烈於當時

垂休光於來禩展卷如遇益深高山仰止之思若夫疆宇之阨塞徭賦之殷繁人物之彬雅制度之恢宏又皆足以輔益經緯光裕憲章化而裁之推而行之道揆法守於是乎在然則是書之作固非徒侈采摭之富以垂空言於後世實可爲官斯土者之鑿鑑也已臣不文未能敷宣景耀裨述紬績而猶得於譬比之餘恭識一言以爲官方之助竊與有榮幸矣

乾隆元年七月朔旦

誥授通奉大夫浙江等處承宣布政使司布政使加一級

紀錄九次臣張若震謹序

勅修浙江通志序

世宗皇帝御極之七年紀綱釐飭制度修明大有頻書祥徵

疊見聲教訖於遐荒人民安於耕鑿朝廷之上師師

濟濟閭里之間熙熙皞皞

聖人在上如日中天禮樂文章燦然明備爰

命直省各督撫纂修通志上之史館彙纂

本朝一統志以昭一道同風之盛臣衛時以總督管巡撫

事備員浙省聞

命之下哀羅典籍延禮儒紳設館授餐矢公矢慎一年餘始

脫稿而臣以奉

詔入覲未遑校勘旋蒙

聖恩改授直隸總督屢移書諮詢今總督大學士臣嵇曾筠

始以剗劄告竣進

呈

今上皇帝是書實經始於臣例得附名簡末而藩司亦以

副本郵寄徵序於臣惟周禮夏官司險掌建九州

之圖周知山林川澤之阻達其道路地官誦訓掌方

志以詔觀事以知地俗春官保章以星土辨九州之

地秋官職方掌天下之圖地與其財用周知利害辨

九州之國使同其貫司徒掌邦之土地之圖與其人

民之教以佐王擾邦國周知九州之域廣輪之數辨

其山林川澤邱陵墳衍原隰之名物及土會之數此

志之所自肇也雖然三代以上志之權在上列國各

自為書獻之天子冢宰掌六典實總司其事三代而

下朝不以披攬為功官不以掌故為亟於是乎風俗

有紀方輿有考太平寰宇輿地廣紀之作雖間亦奉

詔纂述然皆出學士大夫之手自為一家言逞其才

華創為體製典麗華瞻則有之至於徵文考獻體國

經野之義或缺焉迨元之中葉始有一統志之舉而

書不傳至明宣德間乃克有成書我

朝因之然遠稽前代各府州縣雖間有志乘而或出之守

令或成自是邦之耆碩挂漏殘缺不全不備欲如我

朝由縣而申之府由府而申之司彙一省之志乘貫串融

會刪煩就簡著為成書呈之史館蓋亦未之前聞也

夫權操於下則名宦人物方言耆舊皆足以資才人

之膾炙藝苑之采擷魯論所為識其小也識其小亦

道也權操於上則典章制度因革損益必有關於國

計民生之重然後由鉅以及細由重以及輕因其地

因其時繁簡詳略不失其宜魯論所為識其大也識

其大而不遺其小此今日作志之體要也民為邦本

食爲民天浙江戶口殷繁本處所出米穀每不足供
通省一歲之食我

朝
列祖

列宗念切民依豫爲籌畫設立常平倉以備儲積臣蒞任之
後詳稽冊籍大縣多至二三萬石小縣亦不下萬石
而且寬租賜復截漕停徵免累年之積欠豁嘉湖之
浮糧又念省會人民聚居且爲諸郡適中之地設立
永濟鹽義等倉約貯米數五六十萬石所爲先事豫
防者至矣漢唐以來所未之有也浙爲財賦之區地
丁襍項不下三百萬金漕米約百八十萬石歲積月
累畸零積欠勢所不免雍正六年清查天下錢糧有
多至千萬及數百萬者浙民未完不過六十萬臣適
承乏茲土歲際屢豐加以勸導不數年所剩無幾此
亦足以見浙民奉上之誠矣而且漕運則冬兌冬開
未十月已悉抵水次鹽政則私梟遁迹官引廣行紹
所如諸暨義烏浦江等縣松所如華裏奉金等縣片
引不銷之地今悉通商設店此皆

聖朝積累深仁淪肌浹膚感民之切入民之深故能至此
載之志乘亦足以徵一時之盛矣東南爲人文淵藪

歷稽史冊理學有人勲業有人忠孝節義與夫雕龍
繡虎之才指不勝屈我

朝稽古右文振興鼓勵於浙士思尤至渥江南以兩省之
大和中額相符直隸以

畿輔之重而每科館選約略相似雍正八年鼎甲三人

咸屬浙產此自制科以來不多見者上之待士如是

其陛下之報上敢不爭自奮與崇實學而謝浮華勵

實行而祛澆薄由是而學校興由是而風俗厚當拭

目俟之至於兵制海防海塘水利尤爲浙省重大之

務浙東西十一郡濱海者六

國家設提鎮置重兵星羅碁布制度嚴密臣自蒞浙以

後月有校歲有閱又遵奉

論旨首嚴米穀出口之禁而公家協濟運送八閩千艘銜尾

不數日自閩復回如行門戶港汊之間我

朝

聖聖相承德威遠播蒼茫萬里波浪不生然法制禁令固有

不可一日弛者浙東七郡除温台一帶間有入海水

道其餘溪澗之水並入錢江浙西三郡悉由太湖出

海海口固宜暢流而支河小港之水務使深濬則水

不易涸農家得備車戽行旅便於往來其爲利民豈

淺鮮哉臣在浙省荷蒙

世宗憲皇帝修城開河貯有經費隨飭地方官吏不時相度

宜疏而疏宜濬而濬今聞數年以來略無水旱之虞

然日久則淤勢所必至未淤而疏費省功倍亦大較

也若夫海塘之關係地方雖屬浙省而利害兼及江

南坍塌疑有天意而隄防實藉人力雍正十一年偶

有潰決

特命內大臣臣海望臣馳驛南下相度機宜還

朝覆奏我

世宗憲皇帝廬念千里之廣人民城郭田畝廬舍之重不惜

數百萬帑金

命改建一百餘里大石塘我

皇上甫登大寶即

命閣臣經理其事此杭嘉湖蘇松常鎮七郡奠安之慶千

秋萬世之計豈僅目前之幸浙民永久之利也哉邦

之人知其大者而用意焉務農桑敦孝弟其民之秀

者務為明體達用之學以羽翼經傳輔蔽

皇猷士大夫之蒞是邦者知其大而留意焉因所當因革

所當革致力於未事之先不為後事之圖以無負

列祖

列宗暨我

皇上殷殷垂訓之盛心則煌煌

詔諭恭紀首冊一展卷而無非典謨訓誥之垂唐虞三代

之良法美意也其餘山川疆域星野物產等類纂志

者例得備書例所當書亦安得而不書所謂識其大

以及其餘也謹拜手稽首而為之序

乾隆元年歲次丙辰七月穀旦

誥授光祿大夫太子少保兵部尚書兼都察院右副都御

史直隸總督前浙江總督管巡撫事兼理鹽政節制

江南加十二級紀錄十七次又軍功紀錄一次臣李

衛恭撰

勅修浙江通志序

周官職方會稽為揚州山鎮漢興因之以立郡其疆
 索所及則今浙東西之地是也晉晉而分吳興臨海
 東陽至隋而分遂安餘杭永嘉至唐而分餘姚信安
 縉雲至宋而分嘉禾雖建置代殊繡壤交錯抑十一
 郡之所從來漸矣自元置行中書省於浙江而省之
 名自此始明仍其制改為承宣布政使司而省之名
 不易也蓋嘗攬全浙之形勢北通吳會南連閩粵人
 物盛麗都邑雄富昔人按之圖牒徵諸文獻采撫風
 謠載筆而書者踵起相接顧其書不具存其見於今
 日者自咸淳臨安嘉泰會稽寶慶四明至元嘉禾及
 新定赤城諸志而外他無聞焉迨夫省志之作昉於
 明成化間而浙江之有志則成於嘉靖中提學副使
 方山薛君應旂今所傳薛志是己志初屬稿於少傅
 存齋徐君階而應旂重加詮次始辛亥迄辛酉閱十
 載凡七易稿而後成然其間繁簡失倫純駁互見議
 者病之

國朝車書一統幅員之廣軼於前代康熙二十一年前總
 督_臣趙士麟巡撫_臣王國安嘗因薛志之舊輯而新
 之願以數月竣事其簡略猶是我

皇上御極以來聲教誕敷至治翔洽海隅日出之鄉罔不

率俾而尤以兩浙為東南重地

綸綍煥夫訏謨文誥宜夫經制嚴江海之防疏水泉之利

豫廢廩之饒定輓輸之則制鹽筴之權興衡泉布之

輕重通商寓懷來之仁置郵視化行之速皇皇典制

亦既疏舉而廣謀貫行而審畫所以加恩於浙民者

如是其至周且渥矣而循覽舊志多闕焉不載將何

以章軌道而示來茲乎雍正七年

詔天下各修省志以備

一統志之采擇時總督_臣李衛慎選名俊開局編纂徵

前侍讀學士_臣沈翼樓原編修_臣傅王壽檢討_臣陸

奎勳等總其成按討舊聞網羅散軼恪遵

內廷纂修之例徵引原文臚列書目以備考索而於舊

志之外增門一十有七首紀

詔諭

聖製以為全志之綱領若蠲恤若積貯若海防若海塘若

漕運若驛傳若榷稅若鹽法若錢法皆

聖政之大者至載封爵而不列帝王明志之異於史也記

祥異而不附星野明天人感應之理不限於封域也

稽經籍而并及碑碣見文獻之足徵析人物為十門

見道德文章事功學術之各有表見而儒林孝義文苑之非有外於人物也書成凡二百八十卷可謂醇

且備矣越明年督臣衛移節畿輔今督臣元章蒞浙

會纂輯甫竣而臣茲攝乏承宣專任校勘之役自惟

謫陋無所開益仍延臣露於官舍相與晨夕譬比反

覆論定閱一載始卒業即奉有巡撫安徽之

命去漸復猶惓惓於心輒復寓書商榷往來靡間今者屬

將錄板恭呈

乙覽因念是書經兩督臣裁鑿之審二詞臣輯綴之勤而

臣然不文亦復研摩編削歷有一歲之久爰不揣固

陋謹詮敘始末臚言簡端以附名不朽云

雍正十三年三月

誥授通奉大夫江南安徽等處巡撫今陞刑部左侍郎前

浙江布政使司布政使臣王紘謹撰序

勅修浙江通志序

欽惟我

皇上續承丕緒六字同文敷政勤民德洋恩普

軫念浙江海塘重關東南民命

特命臣曾筠往董其役經畫綜理因閱視江海形勢親歷

浙東西周咨審度竊見夫山川之清淑都邑之盛麗

物土之殷饒人文之彬郁負山枕海控吳楚而引閩

粵偉哉誠東南之都會而財賦之上腴也旋叨

恩命授臣以節制撫綏之任甫受事適前督臣奉

勅纂修通志成書將謀剗刪爰於治事之餘遞加檢閱重

為審定剗期授梓閱半載而工竣為門五十有四為

卷二百有八十蓋兩浙風教之所被掌故之所存胥

於是乎在矣按浙省記載自左氏吳語越語而後有

越絕吳越春秋之作遂為志乘嚆矢至漢分吳會丹

陽為三郡有三郡記吳朱育作會稽土地記韋昭著

吳興錄而晉孔羣賀循並有會稽記王韶之有吳興

郡疏鄭緝之有東陽記有永嘉郡記梁吳均有入東

記若唐陸羽之志吳興宋周綜之志臨安羅濬之志

四明施宿之志會稽陳耆卿之志赤城衛玠之志信

安董弁之志新定皆是也沿及元明十一郡先後各

有府志要皆自為一郡之記載而未有蒼萃之青嘉

靖辛酉吾鄉先達方山薛應旂為兩浙提學副使合

十一郡所屬輯成通志七十二卷是為浙江通志之

始

國朝康熙癸亥歲奉文修輯蓋以薛志為藍本而斟酌損

益之稱稱備焉距今五十年其間典禮之修明制度

之因革政理之條貫民物之登耗文章功業之彪炳

而建樹月異日新洪纖備具使佚而不紀何以彰前

軌示來轍乎是編之作開局於雍正辛亥春訖事於

乙卯冬歷數歲之久兼綜眾長考証得失參互同異

旁搜博采可謂勤矣今按其體裁分門別類增舊志

者什之三考古訂今增舊志者什之七而傳述舊聞

恪遵

內廷編纂之例悉徵引原文標列書目以備考索至記

載時事謹依

大清會典采錄科條章奏務存實據以便稽查杜預所謂

發凡言例皆經國之常制史書之舊章此則前志所

未有也臣建旄茲土夙夜冰兢冀康庶事而答

主知而竊懼識有未逮慮有未周恭閱是編誦

聖訓庶知所遵循覽方域庶知所經理察禮祥庶知所做

省采謠俗庶知所化導觀制置而闕廢興庶知所修
舉攬形勝而扼阻要庶知所備禦按兵賦而審虛實
庶知所綜覈視土物而驗虧盈庶知所阜安景仰前
轍庶知所矜式搜討遺文庶知所考鏡蓋治道之綱
維民生之利病一寓目而盡得之他日或能策庸勵
鈍勉竭悃誠鞏海疆而奠澤國以上佐

聖天子維新之化則於是書實重有賴也爰裝就疏進謹
拜手稽首而屬言於簡端

乾隆元年歲在丙辰七月朔吉

誥授光祿大夫太子太保文華殿大學士兼吏部尚書總

理浙江海塘兼管總督巡撫兩浙鹽政印務加十四

級臣嵇曾筠謹撰序

勅修浙江通志後序

周禮小史掌邦國之志外史掌四方之志志之統於史也尙已鄭元訓志爲記而以春秋傳實之蓋記猶述也謂傳述舊聞而不必有所作也王通稱聖人述史而孔子已自言竊比老彭則柱下之所掌與邦國四方之所志一本於述其義明矣而後之作志者以爲志與史異不妨自爲論撰以成一家言究亦未嘗不掇拾前人之緒餘而不言所自出人亦不復辨其所從來遂盡掩古人之作以爲已有甚而割裂文義顛倒字句或不免以文害詞以詞害意承譌襲舛輾轉相仍而反藉口於前人之失不亦惑歟至於記載時政則多隱括其事變易其文而語焉不詳意指流失使後之人無從考其顛末何以傳信於天下臣 龔末學固陋愚無知識竊嘗備員史局忝荷恩命在武英殿修書處行走欽遵編纂御書體例凡經史子集悉采輯原文標列書目或詞義冗長僅從刪節毋許妄易一字煌煌定制蓋深有契於聖人述而不作之義也雍正七年詔直省纂修通志進呈

御覽前浙江總督臣 李衛博徵載籍慎選名俊於辛亥之

春開局編纂而屬臣 露董其成臣 惟志之與史體裁

雖或不同其爲記事之書則一也記莫大於典章記

莫重於經制記莫要於文獻典章者經緯天地綱紀

人倫而垂憲於萬世者也故恭述

聖訓冠於卷首以爲全志之綱領經制者經國之常制因

革損益隨時制宜謹依

會典開載備述科條章奏以爲各門之條目若夫文獻

者用以標敘盛德昭紀鴻懿所謂藏之名山傳之其

人者也先述史書繼述志乘旁及名人之撰錄下逮

里巷之謳吟遐搜博討按古證今而要不外乎述者

近是而或者謂此類書之體非志書之體夫志書之

與類書亦何所區別乎班固十志原於史遷之八書

而歷代史氏因之若律歷禮樂刑法食貨之屬皆類

也而均謂之志唐杜佑倣劉秩政典益以大歷以還

時政廣爲通典二百卷而劉煦志經籍列之類家宋

鄭樵輯天文地理職官選舉等類撰二十略而統名

之曰通志則類書之稱志有由來矣不甯惟是陳壽

作三國志司馬彪作續漢志司馬光惠歷代史繁不

能徧覽遂爲通志八卷以獻英宗命置史局續成通